



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim




tir yimyim

TAPAK 8

India ya par warplanes teraksa
agi nembangtsü: Khawaja Asif

Wuhan Open nung Sabalenka
asayatsü renema lir



VOL. XXII ISSUE NO. 351 (ADOK 351)

DIMAPUR TENTONÜ (MONDAY)

MONGPUTENI (OCTOBER) 06, 2025

₹ 5.00

NFHRCC-i mapang shitak nung mapa tembangtsü nenshir

Dimapur, October 5, 2025 (TYO): NPWD, R&B ajanga Work Orders 17 asoshi contractor tem dang ita 12 mapang züngzükja aliba tsüngda mapa tembanga inyaksü nenshiang ta NFHRCC-i metetdaksüogo.

Parnok nem züngzükja aliba mapangji December 18, 2025 nü tembangtsü aser kasa temepishiba ya April 2025 nunga contractor firms nem metetdaksüogo.

Maneni, sorkari tejak mereprangi mapa inyakba indang senotsü shitak agütsütsü aser mapang shitak nung tanüngba mapa tembangtsü ayongzüksü metetdaksür ta NFHRCC-isa ashi.

Tzüngluruwa süiogo anungji contractor tem aser bangdak Department-i dry working session nung mapa shitak inyaka aotsüla ta parnokisa ashi.

Bangdak Department-i Baghty Division kübok Merapani/Changpang Sector, Mangkolemba Division kübok Jangpetkong area aser Peren Division ajunga nung SASCI loan grant DPR indang 2nd phase tenzüksüla ta NFHRCC-isa metetdaksü.

Ministry of Road

Transportation and Highway (MoRTH)-i 30 meters (100 ft) Right of Way (ROW) indang NOC atema NFHRCC ketdangsürtemi August 21, 2025 nü New Delhi nung Secretary MoRTH den ajuruteptsü maongka ngua liasü.

Iba sülen committee-isa Chief Secretary, GoN aser Dy.CM, Planning & Transformation, National Highway na den ajurutepa iba mapatong takok ngua inyaka aotsü atema amalitep tajungba alitsü jembitepogo.

Nagaland sorkari Union Ministry dang Nagaland Express Highway (Foothills Road) ya East nung Arunachal Frontier Highway den aser Khelma nungi Dima Haso District, Assam aser Tamenlong district, Manipur nung aliba National Highway No.137 den sendakteptsü atema jembiteptsü ayongzüker ta NFHRCC-isa metetdaksü.

Committee-i Foothills Road Project atema onük mebenteti aliba kar jembitsü atema aiben Nagaland Chief Minister den ajuruteptsü mepishia arur saka tang tashi pa den majurutepteti lir ta The Media Cell, NFHRCC-i sangdong ka nung ashi.

Mayang Lima alima nungi pilaogo



Mayang Lima

1:30 ako shi nung Tuli nungi Dimapur leni aoba mapang Golaghat anasa parnok amenba gari lendong tulu ajurua pa yangji tekolak aser tesaret mejungi yiru aser iba sülen Jorhat Mission Hospital nung yur anepalutsü tenzük. Iba mozü kidang pa temangji tera junga shia arudaksür külen tangalen mozü ki tajungba bushia aotsüba liasü, saka ajak asoshi tia majung, yangji pa temangji tajungba küma shia marutet ser alima nungi pilaogo.

Asür Mayang Lima ya Principal District & Session Judge nungi Upa Lokayukta menden tashi tongtetba yimten lenir aser obendanger ka liasü.

Pa den asüpila sentep sentong October 06, 2025 anüngdang 11:00 ako nungi Senden Reju, Dimapur nung alitsü sentong renema lir.

DPC-i online membership drive tenzüker

Dimapur, October 5, 2025 (TYO): Dimapur Press Club (DPC)-i October 6, 2025 nungi October 20, 2025 tashi annual membership drive agitsü osang metetdaksüogo.

Tang mezüng atema DPC-i membership registration maparen ya online nung dang agitsü aser iba ya züngsem ajaki ayongayonga teniung agütsütettsü atema lir.

Züngsemtemi DPC website google.com/view/dimapurpressclub nung register asütsü.

Iba dak sendakba nung osang talila metetnürtemi DPC President Henlly Phom mesüra executive züngsem mashii ka den tongteprateptsü akok.

DPC membership fees:

New Members: Rs. 300

Renewal: Rs 250

Zunheboto senden ajanga Naga nunger akangalongshir: FNR

Dimapur, October 5, 2025 (TYO): September 27, 2025 nü Zunheboto tiyongtsü nung kanga dang tongtipang sentong ka agiogo aser iba ya Naga nunger asoshi telemtetba tajung agiba mapang ka ama bilemtettsü.

Angami Public Organization-i Jotsoma nung aser Ao Senden-i Ungma nung ayongba ama Sumi Hoho-i ayongba senden ya putepshiba indang sentong ka dang masü saka tanüla aser yimtenren nung tejakleni mera agia aoba ama liasü ta FNR-isa ashi.

Zunheboto nung FNR, Naga Political Groups (NPGs) 15 aser kin hohos 33 tashi kilempok ka nung adenshi aser iba ya tejen o kaktepba jembitsüba masü saka angatsü, jembitsü aser tejakleni aotsü atema adenshiba liasü. Iba sentong ya ajemaluba kuli ka liasü aser Naga nunger ajaki tanishirtem dang nübortemi yimjung aser temeten aginüba nenshi.

Iba senden nung "Zunheboto Resolution" agizüka tembang aser künü anogo iba kulikaket ka tasüta it tezüngzüktep ka ama

züngshitsü. Naga Machang ka kübok Naga nunger alitsü aser Naga telok ajak tsüngda chichiba tai tokteptsü aser Naga yimtenren mapa ya ajak meyong ta asüba bangjemtepa liasü. Iba bangzüng ajanga NPGs dang sabang ka nung longjemtsü asüngdang aser iba ya olemteptsü atema dang masü saka taneptsü angutsü atema lir ta FNR-isa ashi.

Zunheboto Resolution nung onük tanabuba nung Naga civil aser religious telok ajaki Naga Machang pusema nungittsü bangjemtepa liasü. Naga Machang ya Naga nunger ajak putiotsü aser yimtenren temetentem nung ajemdaker longjemba sabang ka asütsü. Naga nunger tanü teimla tulu nung lir aser nübortem dang tayongzükbatem agi meketbanga liaka asenok maneni teimla mesamatsü mepishir ta FNR-isa metetdaksü.

Council of Naga Cooperation and Relationship (CNCR) kübok Naga Machang ya lemsar olemtepa nungi külem sabang ka nung adenshir olemteptsü atema lir. CNCR ya ketdangsübaren

telok ka masü saka tanüla sabang ka, ochi jembitsü, metokmeperitem agizükteptsü aser putepshitsü atema Machang ka lir ta FNR-isa ashi.

Zunheboto senden nung yimtenren onük lemsatepba dang masü saka tanüla asüngsangshitepogo. Iba bangzüng ajanga arogotem dang October ita piyong sarasadem sentongtem ayonga agitsü ayongzükogo ta FNR-isa ashi.

Naga nunger mapang talangka jajayonga arur saka Zunheboto ajanga asenok anibelemaka teimla angutsü ta nenshir. Asenoki mekoktettsüsa ajuruaka, asenoki koktettsü langkabo lir ta asenok dang nenshir. Naga nungeri ola adokogo. Lennirtem, hohotem, arogotem, yimtsüngtemi yimjung, temeten aser telongjem agiba shiogo. Zunheboto ya senden ka ama masü saka movement ka ama bilemtetdi aser asenoki iba nung teyariteper ka ama timi jajadi, ochi jembidi aser kanga meimtepdi ta Forum for Naga Reconciliation-i metetdaksüogo.

BPF-i BTC madak sorkar yimsü asür

Guwahati, October 5, 2025 (Agencies): Bodoland People's Front (BPF) president Hagrama Mohilary-i Deobarnü Bodoland Territorial Council (BTC) nung Chief Executive Member (CEM) inyaksü tezüngzüktep agiogo.

"Onoki nübortem dang nangzükbak ajak inyaksü. Onoki akokba tashi asen sensotem yaritsü. Onoki parnok khuret koktettsü atema meranga inyaksü. Iba ya ataloktsü atema ni Assam sorkar aser asen cabinet minister tem dang amalitepa inyaksangshitsü mepishir. BTR nung alirtemi onok pusema nungitba aser temulung alemba atema kanga pelaba metetdaksür" ta Mohilary-i ashi.

"Onoki election campaign mapang nangzükbak inyaksü. Asenoki Bodoland ano tajungba kümdaktsüdi" ta paisa ashi.

Kokrajhar nung aliba Bodoland Secretariat Field nung

tanü tezüngzüktep agiba sentong ayonga agi. iba sentong nung taoba minister Rihon Daimaryia Deputy Chief Executive Member (Dy. CEM) inyaksü atema tezüngzüktep agia liasü.

"Hagrama Mohilary aser par Executive Members-i Bodoland Territorial Council ketdangsütsü tenzükbak atema tenüngsang agütsür. Parnoki Bodofa Upendranath Brahma mangdang ataloktsü atema bendanga agüja inyaksü. Assam sorkari akokba tashi BBTC sorkar den amalitepa nübortem taginüba tongtsütsü" ta Assam Chief Minister Himanta Biswa Sarma-ia ashi.

Iba sentong nung Assam Governor Laxman Prasad Acharya, Assam cabinet minister tem aser Tipra Motha tanishir Pradyot Bikram Manikya Debbarma nunger aden.

Tawa BTC elections nung BPF-i menden 40 nungi 28 nung takok angu aser UPPL-BJP

teloktep sorkar atsüngdok. United People's Party Liberal (UPPL)-i menden 7 aser BJP-i 5 angu saka Congress-ibo menden ka danga mengutet.

Assam State Election Commission-i September 27, 2025 nü elections results sangdongba sülen Hagrama Mohilary-i anir teshimtet telok kati Raj Bhavan-i oa council sorkar tasen akümtsü kuli agüja liasü.

Bodoland Territorial Council ya Constitution nung Sixth Schedule kübok amenok. Iba ajanga Bodoland Territorial Region ta ajaba district 5-Kokrajhar, Chirang, Udalguri, Baksa aser Tamulpur madak ketdangsür.

September 22, 2025 nü BTC election nung candidate 316 toktepa liasü. Council menden 40 nungi 30 Scheduled Tribes (STs) atema reserved, 5 non-STs atema aser 5 unreserved lir.

Dr. Rio-i Mayang Lima mang ayimer

Dimapur, October 5, 2025 (TYO): Nagaland nung taoba Upa Lokayukta Wb. Mayang Lima October 5, 2025 nü asüba osang angashia temulung raksar ta Chief Minister Dr. Neiphiu Rio-i metetdaksüogo.

Asür Lima ya lawyer tajung ka aser bendanga agütsüba public tenzüker ka liasü aser pai menden balala nung state sorkar tenzükogo. Pa mapa nungi anisüngzüker anguba sülen-a pai public tenzüker aser ibaji Vigilance

Commissioner inyakba aser iba sülen Upa Lokayukta inyakba ajanga kuli agütsür ta CM Dr. Rio-i ashi.

2018 küm pai 22-Arkalong Assembly Constituency nungi toktepa ajanga pai nübor tenzüksü jangraba sayua liasü ta Rio-isa ashi

Pa ya taochi aketba, ajemalu aser temulungso nisung ka liasü aser pai teti nüngdakbapur yaria aruogo. Pa ajungbena asüba ya asen loktiliba atema takoksa tulu

lir kechiyong pai nübortem asoshi inyaksü jenti liasü ta paisa metetdaksü.

Pai asenok toktsür aoba atema mang ayimer saka kasa mapang asenoki pai toktsüba senmang bilemtetdi aser pa tatishitsü ajanga asenok maneni ajungmesoangma. Iba tejashi mapang ni aser ozü kibongi asür kibong den asükhü lemsateper aser Tulusang Tsüngremi parnok nem tashi aser tesünap agüjangma ta Dr. Rio-isa metetdaksü.

Dibuia Kaketshir Telongjem Dimapur Hon Jubilee mungogo



Dibuia Kaketshir Telongjem Dimapur tenteter kum 50 ajungba Hon Jubilee mung nung adener aser o jembir Bendanglila, NCS, Joint Secretary, Government of Nagaland (achichi) noksa nung angur.

Dimapur, Mongputeni/Oct. 05 (TYO): Dibuia Kaketshir Telongjem Dimapur tenteter kum 50 ajungba Hon Jubilee mung October 2, 2025 nu munga liasü.

Sentong nung o jembir Bendanglila, NCS, Joint Secretary, Government of Nagaland ajanga iba benjongmung omen "Holistic Growth" nung ajemdaker

jembidang, temang, tekolok aser mulungsentsü kasa renloktsü nungdakba indang lemsatepa liasü.

Takum jangratema alitsü asoshi ochishia, indang-indanga aser temeim nung alitsü tongtipang ta ashi aser lokti asoshi azümesen mesüi maneni meranga inyaksü nungdakba lai shia liasü.

Imliyanger Tzudir (IFS

Retired) ajanga sentong nung tajungshi o jembidang, kaketshirtem dang tanur yimya amshiba melena tekolok shisatsü aintsü aser lokti ajungtsü asoshi pei sempet aser shisatsü amshitsü ayongzük. Pai kaketshirtem dang pei sempet jangjateta kija aser lokti takok asoshi inyaksü ajungmesoa liasü.

Ao Kaketshir Telongjem

Dimapur tir Imnatemsu Pongen-i Dibuia Kaketshir Telongjem Dimapur ajanga AKTD nung shilem tajung agiba atema pelaba lemsatepa liasü.

Dimapur Dibuia Senso Telongjem tir Afong Walling-i lanurtem dang tantsü-tambo dak nungi yimya tajung angazüka shisaluyimba aser lenla balala nung takok angutsü asoshi meranga inyaksü ajungshia liasü.

Dibuia Kaketshir Telongjem tir Ayudi Longkumer-i yimtsüng nungi shisaluyimba tsütsü kaketshir tajung jenti adokba lemsatep aser shisaluyimba jenjang tali ajungkettsü asoshi bendanga agütsür inyaksü ayongzüka liasü.

Iba Jubilee pangzüng ama Dibuia Kaketshir Telongjem Dimapur ajanga Dibuia nung Longrapenlichen Tourist Centre Project nung park ka

yanglutsü aser shisaluyim aser career tsütsü rangloker kum ana nung khen career guidance aser counseling seminar tem ayongzüktsü pangjema liasü.

Iba den ano NSSB, NPSC, UPSC aser SSC ama competitive exam agütsütsü jangra alir nem senotsü teyari agütsütsü sangdonga liasü.

Iba sentong nung DKTD tir Imlikala Ao-i pela agizükba o jembir, Dimapur Dibuia Senso Telongjem kimen Chubawati Aier-i kaketshir asoshi balaka sarasademsü aser Rev Dr Mar Pongen, Associate Professor, Discipleship Bible College, Dimapur ajanga sentong tenzüka sarasadema liasü.

DKTD kimen Lanupokiyim Longkumer-i melepzüng o jembiba den Jubile Planning Committee report convenor Oyimpong Longchar-i agütsü aser Maclean Imchen-i sarasadema sentong tembang.

Aoyimkü mung alima teintet rogomung amuong

Dimapur, October 05 (TYO) : Alima ajunga den külemi taoba October 01, 2025 nu Aoyimkü, Dimapur nung alima teintet rogomung "Internatiomnal Day of Older Persons" sentong tajung ka ayongzüka mungogo.

Iba sentong nung teintet rogotem shi aser tanela nung tashi itta alitsü asoshi ajungshia jembidang, teti tangar kija, kibong aser lokti asoshi mapa tajung inyaka mazüngi alitsü asoshi tesayur Dr.Tainla Mar-i kum 60 nungi temapur taintem nem tayongzükba agütsü. La iba sentong nung tongti o jembir liasü.

Laisa tain rogotem dang pei jangraba mapa tajungtem inyaka alitsü aser lanurtem dang teka

mapa aser molokmotok atakba yimyatem ama sayuba sentong tenzüksü nungdakba indang lemsatep. "Tain rogotem ya khenkhenbo alima repranga jajatsüla aser sempetlep salaba sentong tajunga ayongzüka aka nunga ajungtsü," ta laisa len tajung ka sayu.

Iba kasa sentong nung tantsü tambu nungi tayongzükba o jembidang, Wb.Obang Ozükümi tainrogotem dang mangyangtsü mebilemi tajung inyaksü bilema alitsü ajungshi. "Asenok rongnung arenzükteptsüla aser ibai agütsütsüba mapang lir," ta paisa ashi.

Iba kasa sentong nung o jembir pusema shisalemsatepdang, alima nung teintet rogotemsa tashi

temetetba aser takarba, anungji tangar nungi meshitsü imlaa masü pei akaba agi alima nung temelenshi tajung bener arutsü tangatetba nung, lanurtem den pungsema lokti aser ymten nung teintet rogotemi shilem agitsü nungdaker ta tejaoker nungi Tir Yimyim Yimozülur K.Temjen Jamiri metetdaksü.

Iba alima teintetrogo mung amungba tetezü aser omen indang Dr.Ngangshi K Ao-i jembia liasü. Iba sentong ya Aoyimkü Baptist Arogo nung sannüker Rev.I.Temsü Aier-i sarasadema tenzüka aser telok külemui sarasadema tembang. Iba ama alima anogomung tongtibang ya Aoyimkü nung maneni kum shia alitsü parnoki teletetba agiogo

Kohima nung Open Book series tanabuba ayongzük



Kohima, Mongputeni/Oct. 05 (TYO): Writers' Collective Kohima ajanga Task Force for Music & Arts (TaFMA) den lungjemer October 04, 2025 nu D/Café Kohima nung 'Open Book, exploring the wonders of Naga stories' series tanabuba ayongzüka liasü.

Wadang balala nung aliba nüburtem kati ka yaritepa aser ajungmesotepa jajatsü mangdang nung series tanabuba nung Vibeituoouo Kuotsu Solo-i jembia liasü, shiba "The Light After The Storm" nungja agütsür kakat ka

zülua lir aser tan ita sa sayatsü. Lai Easterine Kire aser Vishü Rita Krocha ama Naga nunger kakat zülurtem ajanga la ajungmesoba indang lemsatepa liasü.

Open Bool series nung shilem ka ama 'Fresh Voices Open Mic' segment nung lanur sangro mejemer aser kakat zülur Runshito Lims, K. Roselyn Miachio, T. Dili Khekho, Kenlumzailie Michui, Sofia Livimi Swu, Boliti Achumi aser Mharoni C Yanthan nungeria shilem agia liasü.

AKTDGC purtemi yimkong lenmang merüktettsü



(Abelen) AKTDGC purtemi Dimapur College anasa yimkong lenmang merüktettsüba aser (Achiji) Ao Kaketshir Telongjem Dimapur-i yangluba Yimkong Sitewak (PWD-Forest junction) merüktettsüba noksa nung angur.

Dimapur, Oct.05 (TYO) : Taoba ita September 27 anogo nung Ao Kaketshir Telongjem Dimapur Govt. College purtemi anepdang 6 ako nungi 9 ako tashi Dimapur nung PWD-Forest lenjem nung Ao Kakeshir Telongjem Dimapur -i 2018 kum hon jubilee amongba nungtem nung Dimapur yimti nung alirtem

asoshi yanglutsüba 'Yimkong Sitewalk' merükteta inyakogo.

Iba yimkong lenmang merüktetba sentong ya AKTDGC purtema sangkum 2026 kum hon jubilee amongtsü aliba nungtem nung mapa inyaksü ayongzükba sentong ka liasü. Iba kasa anepdang kasa teloki Dimapur Govt College

anasa yimkong lenmanga merükteta inyaksüogo.

AKTDGC purtem jubilee amongba sentong ya anogo ka agiteta sentong balaka yanglua amongba aser chiyongba dang masü saka külemi longjemer yimkong asoshi mapa tajung inyaksüba mapang ka asütsü ta AKTDGC lenirtemisa metetdaksü.

CM Dr. Rio-i Mayang Lima asükhu lemsatep

Dimapur, Mongputeni/Oct. 05 (TYO): Nagaland indang taoba Upa Lokayukta, Mayang Lima, October 5, 2025 nu asüba osang angashia kanga jashir. Pa ya tetemsü okatsür aser bendanga agütsür nübur tenzüker ka liasü, shibai jenjang balala nung state sorkar tenzüka liasü. Pa mapa nungi anisüngzük anguba sülena nübur tenzüka mapa nung masetshie nokdaka

Vigilance Commissioner aser ano Upa Lokayukta inyaka liasü, ta Nagaland Chief Minister, Dr. Neiphiu Rio ajanga sangdong ka nung ashi. Pa yimtenren nunga tetsüng ajemoka 2018 kum 22-Arkalong Assembly Constituency nungi toktepba ajanga pai nübu tenzüksü jangraba tali jangja sayu. Pa dak dangar asoshi aria bilemba, ajemaluba aser temeim sayutetba yimya tajung aliba

yong nüburtemi kanga saklok, shibai nungdakbapur teti yaritsü mulunga liasü, ta CM Dr. Rio-i ashi.

Pa ajungbena asüba ya asen lokti asoshi takoksa tulu lir, kechiaser asen nübur ajungtsü asoshi pa dak ano teimla tulu liasü. Pa asüba ajanga tazüng adokba süngdaksütsü tasak asütsü.

Asenoki pa mang ayimba mapang pai mapa tajung inyakba asenoki bilemtetti. Pa indang tatishitsü tajung agi asenok maneni ajungmesotsü imlar.

Ni aser ozü kibongi mangyimer kibong den asükhu lemsateper. Tulusang Tsüngremi parnok nem tashi aser temulung nung anisüngzük agüjangma aser pa tanüla teti tatem maka tesunep nung anisüngzükjangma, ta CM Dr. Rio-isa ashi.

EC-i Bihar assembly elections atema mapatong tasen 17 benoker



October 05, 2025 nü Patna nung osangbenertem senden ka nung Chief Election Commissioner, Gyanesh Kumar den Election Commissioner ana- Sukhbir Singh Sandhu aser Vivek Joshi nungeri jembidang tangokba noksa nung angur.

New Delhi, Mongputeni/ October 05 (Agencies):

Amongnü Election Commission (EC)-i, taruba Bihar assembly election atema mapatong tasen 17 benoker aser item mapatongji India tesem ajaklen benoktsü, ta metetdaksügo.

Amongnü Patna nung osangbenertem senden ka nung jembidang Chief Election Commissioner, Gyanesh Kumar-i, "Bihar nung mapatong tasen 17 takok ngua benokogo; election agiba mapang kar benoktsü aser ano kar züngoktsü," ta metetdaksü.

Kumar-i, "Bihar nung assembly constituencies 243 lir-STs atema 2 aser SCs atema 38 lir. Tang Bihar Legislative Assembly kümsük ya November 22, 2025 anogo nung

tembangtsü, anungji iba anogoji matongdangsa elections agitsü," ta metetdaksü.

Paisha, "Tang mezüng Election Commission-i booth-level officers nem training agütsügo. June 24, 2025 nü Special Intensive Revision (SIR) tenzük aser atemzükba mapang nungsa iba mapatong tembanga inyak," ta metetdaksü.

"Voters list renembaji Electoral Registration Officers (EROs)-i lir. Bihar nung assembly constituency 243 prongla nung constituency shia ERO kaka lir. Küm 22 sülen parnok- EROs 243 den külemi BLOs 90,207-i voter list merüktetogo," ta pai metetdaksü.

Item mapatong tasen kübok Bihar densema India tesem

balala nungji BLOs aser BLO Supervisors 7,000 dak tema nem IIIDEM, New Delhi nung training agütsügo, ta pai ashi.

CEC-isa, BLOs, BLO supervisors, polling/counting staff, CAPF, monitoring teams aser micro-observers nem senotsü anasü agi tali agütsütsü; tang mezüng EROs aser AEROs nem 'honorarium' agütsütsü, iba dak alia achi-ajemtsü agütsütsü, ta metetdaksü.

EC-i, voters indang mobile phone meshia ayutsü atema polling stations kima counters lapoktsü aser polling station nung nisung tali nungtepba ajema akümtsü aser tarensena nokdakba tatsüba akümtsü atema ajungketa aliba kiojentem amshitsü, ta metetdaksü.

Darjeeling nung anentsüh lendong nung nisung 18 süogo

New Delhi, Mongputeni/ October 05 (Agencies): Amongnü West Bengal kübok Darjeeling nung anentsüh lendong nung nisung 18 süogo aser aika samaogo.

West Bengal Chief Minister Mamata Banerjee-i X ajanga takoksa angurtem den mangyim jashi lemsatep aser helpline numbers sangdong.

October 6 nü Mamata Banerjee den state chief secretary nati lendong atalokba tesemji semdanga tensa asadangtsü. Laisa takoksa angurtem nem senotsü teyari agütsütsü ta metetdaksü. Tzünglu maneni aruba ajanga Darjeeling nung tongtibang lenmang aser apu aika raksatsüogo.

Honibar aonunga Mirik-Sukhiapokhri lenmang nung anentsüh alua ki aika ponger ao.

Darjeeling SDO Richard Lepcha-i, "Yasüng nungi tzünglu sashia aruba ajanga Darjeeling subdivision nung anentsüh tulu alua nisung 9 süogo, ajisüaka asürtemji iba dang nungjagi teimba asütsüa akok, kechiyong tang kümzükba maparen teinyakdak," ta metetdakja liasü.

West Bengal CM Mamata-i X ajanga, "Yasüng nungi tzünglu maneni aruba ajanga ghonda ishika tsüngda North Bengal aser South Bengal tesem aika nung tzü metsüngba ajanga tebilemtsü akar," ta metetdaksü. Laisa, "State HQ aser districts nung 24x7 control rooms amenoka lir. Nabanna Disaster Management Control Room den + 91 33 2214 3526 aser +91 33 2253 5185 ajanga tongtepratepang, iba dak alia Toll Free Numbers ji + 91 86979 81070 aser 1070 lir," ta metetdaksü.

Ato kilonser Narendra Modi-ia X ajanga, "Darjeeling nung apu chirepba lendong nung nisung aika asüba osang angashia jashir. Takoksa angurtem den ni mangyim jashi lemsateper, yirua alirtem tekeraba nung aneptsü atema ni sarasademtsür. Iba lendong agi kongshirtem nem akokba tashi teyari ajak agütsütsü," ta metetdaksü.

District ketdangsertemi relief camp amenokba sülen medical teams aser melungtet teloktemi chiyungtsü aser tejenokdak densema teyari balala

agütsüdar.

Ano külen Indian Meteorological Department (IMD)-i October 6 tashi Darjeeling aser Kalimpong densema sub-Himalayan West Bengal tesem aika nung tzünglu maneni arutsü, ta tekümdangtsü metetdaksüogo.

October 8-9 anogotem nung UK Ato kilonser Starmer-i India semdangtsü



New Delhi, October 05 (Agencies): United Kingdom Ato kilonser, Keir Starmer-i October 8-9 anogotem nung India semdangtsü; tang mezüng pai official süa India semdangtsü, ta Ministry of External Affairs (MEA)-i metetdaksü.

October 9 nü Mumbai nung UK Ato kilonser Starmer aser Ato kilonser Narendra Modi nati India-UK Comprehensive

Office of the
LONGSA EAGLE CLUB
H.Q: Longsa Village,
Mokokchung, Nagaland

TENÜNGSANG AGÜTSÜR

Mr. & Mrs. Merentoshi R Jamir
Jala, **Miss. Kitipen Jamir**, lai
Nagaland Table Tennis
Association (NTTA) kübok UTT
28th Inter-District & State Table
Tennis Championship 2025,
Rongjui 30 nungi Mongputeni 3
tashi agiba nung U15 Girls'
Singles aser U17 Girls Doubles
nung Championship tittle nguteta
Club sanger aser Longsa
nunger ajak nem khonang
nüngsang tulu bener arutsü
nung kanga pelaba lemsateper.
Jala shisaluymba aser la
wadang nung Tsüngremi
maneni azükarujangma.

**Sdl-
Maongkaba
President**

**Sdl-
Talikal
Gen. Secy.**

MP nung tanurtem atema 'Coldrif' mozü zülutsür doctor ka apu

New Delhi, October 05 (Agencies): Madhya Pradesh kübok Chhindwara nung aket mozü ajemba agi tanur 14 asüba sülen state sorkari aket mozü 'Coldrif syrup' nokdangogo.

Tanurtemji iba mozüji ajemba ajanga tezüngjang nung timtem adokba agi asü südi ta bilemer; iba mozü nungji 'toxic' tali aliba putetogo.

Ketdangsertemi ashiba agi, Coldrif mozü samples ji Chennai nung aliba Drug Testing Laboratory nung tendangba sülen iba mozüji "Not of Standard Quality" ta sangdong.

Tamil Nadu Directorate of Drug Control-i iba mozü nungji diethylene glycol (48.6% w/v) aliba jangja aser ibaji temang atema kanga majung.

Coldrif batch (No. SR-13; Mfg: May 2025; Exp: April 2027) ji Kancheepuram nung aliba Sresan Pharmaceuticals-i yanglu.

Item osang jangjaba sülen Madhya Pradesh Food & Drug Administration-i state tesem ajaklen iba mozü shibelenba aser ayokba nokdangba den külemi tang rizünga aliba mozüa ajak aputsü tetuyuba agütsügo.

Iba company-isa yangluba tanga mozütem-a metendang tashi mayoktsü tuyuogo.

Tanurtem nem iba mozü zülutsüba atema Honibar aonung ketdangsertemi Dr Praveen Soni puogo. Asürtemji teimbaka Chhindwara district nung liasü. Tanur 10 Parasia subdivision nung asü aser tanur trok Nagpur aser Chhindwara na nung treatment tagidak lir.

Chief Minister Mohan Yadav-i, aibelenertem nem temerenshi tulu agütsütsü, ta sangdongba den külemi asürtem kibong shia nem sen lakh pezüzü teyari agütsütsü lemozütsügo.

Madhya Pradesh nung tatalokba nung ajemdaker Tamil Nadu state sorkaria state tesem ajaklen Coldrif mozü nokdangogo.

Ano külen tanga osang ka nung, Central Drugs Standard Control Organisation (CDSCO)-i state trok nung aket mozü aser antibiotic mozü yangluba unit 19 mita oa bushisüngdang tenzükogo. Item unit mita oa samples tendangba team shia nungji ICMR, NIV Pune, AIIMS-Nagpur, NEERI aser CDSCO nungi mongintem densema lir.

Strategic Partnership kübok lenla balala asadangtsü; item lenlatem rongnung shishilembaba aser investment, technology & innovation, defence & security, climate & energy, health aser shisaliok densema lir.

"Lenir anatisa regional aser International dak sendakba tongtibang onüktem nung tebilemba lemsateptsü," ta MEA-i metetdaksü.

Modi aser Starmer nati Mumbai nung 6buba Global Fintech Fest nung adentsü aser okila jembitsü. Tenati industry nung mongintem, asalentong yanglurtem aser tasen purapiteta inyakertema ajurua jembitsü.

"Taküm July 23-24 anogotem nung Ato kilonser

Modi-i UK semdangba sülen tang UK leniri India semdangba ajanga linük ana tsüngda tesendakatep tajungba akümtsü. Iba ya ajanga India aser UK na külem mangdang ataloktsü atema maongka angutsü aser partnership tajungba yangertsü," ta MEA-isa metetdaksü.

India-UK Free Trade Agreement (ATA) tezüngzüktep ya Modi aser Keir Starmer na lia agia liasü. Iba tezüngzüktep kübok linük ana tsüngda shishilembaba jenjang tajungba akümtsü.

Iba tezüngzüktep nung India Minister of Commerce & Industry, Piyush Goyal aser UK Secretary of State for Business & Trade, Jonathan Reynolds nati sign süa liasü.



TIR YIMYIM YIMOBILEM (EDITRIAL)

DIMAPUR MONDAY, OCTOBER (MONGPUTENI) 06, 2025

Nisunger arshi

Tsüngremi nisung yangluba mapang, paji alima nung küm kwi lidaktsütsü assohi yangluar Laishiba nung shia mangur, saka, ashiko, Tsüngremi nisungji alima nung teti alitsü asoshi yanglu südi ta bilemer. Ajisüaka, nisungi Tsüngrem pelatsüsa melitetba agi pa jashir, Noah aser par kinungertem dak alaka alima nung meimchirtem ajak samatsü aser idangjiang, Tsüngremi nisung nem alima nung alitsü asoshi arishi küm 120 latettsüba asenoki Lipok tapu 6 tekong asem nung shia angur. Atangji, iba sülenjia Noah-bo arishi küm 175 aliba angur. Ajisüaka, asenoki Tsüngremi latettsüba arshi küm 120 ji masü saka kanga ajema alur, David chubai pa joko yakta asütsü mapang aruba meteta, Tsüngrem dang "ozü arshi tenemer ser metsü aser lir anasü dang alitsü," ta sarasademba ka Tenüngsang Ken 90:10 nung shia aliba nung dang amanger. Ibaji asenoki David sarasadem mashilen angatetba ka asütsü, kechiyong alima nung nisunger arshi yabo Tsüngrem dak alaka chubai agütsütsü makok. Aji oda, asenoki Tsüngremi ashiba arshi 120 ji masü saka David-i ashiba arshi 80 dakji dang amangra, asenoki Tsüngrem dak amanger masü saka David dak amanger asütsü. Ibaji bilemdanga, asenoki tangatetba kati arur, alima nung taküm ya Tsüngremi agütsüba arshi tongteta alitsü merangtsüba kanga tongtibang kümogo. Atangji, tongtibangtibajibo, alima nung arshi talangka alibaji masü saka kopiga lidir Tsüngremi mulungba nung alima nung alirtem asoshi teyari aser temoatsü agütsür taküm ka kümteta alitsüba kati dang lir. Asenoki kodang ibaji angateta lidir, asenoki alima nung talangka alitsüba kati masü saka alima nung alidang mapa tajung tuluba aser teimba inyaktsü merangtsüba kati dang tongtibang asütsü. Atangji, arshi küm 120 alitsü purtem asoshi arishi küm 60 aser 70 atongbaji ano taküm lia aotsüba len talangka lir, anungji tanü putu tensa nung 'Senior citizen' kümerji ta mesüra 'pensioner' ji ta peisasa ayazüka moutettsüsa tantsür tambur kümer alitsüba kati masü, saka arishi küm 60 aser 70 ji ano taküm tewangwang danga ta bilema yimten aser lokti nung saru nunga adentsü aser nübotokdaka adentsü ta peisasa pei taküm aser temangji kümshia alitsüba kati kanga tongtibang asütsü. Aji oda, nisunger arishi ya talangba-talangba akümtsü, anungji alima nung ya tanur aser lanurtem dang nungibo teintet rogo teimba kümadoktsü. Ibaji bilemdanga, nisung shiai pei taküm aser pei tenüng ya apayua alitsüba kati tenüngdaktsü lir. Tanü asüng balaka nisungtem rongnung anojungi ajungbena timtem aser lendong balala nung nisungtem alima nungi pilaba angashir, kechiyong nisung arshiji Tsüngrem ket nung dang lir. Anungji, nisungji arshi talangka alitsü mesüra tatsüka alitsü ta masü, saka nisungji alima nung khen alidang junga alitsüla. Arshi küm 120 aliyonga, aji nisung asoshi tatsüka dang asütsü. Aji oda, Tsüngremibo arshi talang toktsü ser nung arshi tepiyong meshitaklen dang jajara, asenok asoshi aji kechi sütsü? Chirnurtem asoshia asen majung alibajibo senmang mekümtet aser meshitaklen nungi yanglua yutsüba nungji nümadanga melitet. Aji tangar dang koda rasaa ashitsü? Aji oda, Tsüngremibo asena asen yari arshibo agüja lir, anungji iba arshi nungji asenokia tajung kobateka inyaktettsü ta asüba kati dang Tsüngremer sentong nungbo alitsü. Ibaji mangateti asenoki arshia tepdoka chia ajemer, rongsen bendener, seplepa jajar aser tangar ajemoka yutsür asenok akatsü meranger aser tangar taküm samatsür asenok chubatsü merangba tashi asenok rongnung ataloker. Aji oda, asen langbang sünga chiyongtsü yur chiyongdang, asenok ochimashi mapa agi taonunga karbo chi mechiyong tebok tazüng yipteni idagi ta bilemdi. Kasaji, asenoki yimten aser lokti nung tashi aginü dang tashiyim amshiba agi, kibong karbo tesünep menguteti taküm piyong mangyim jashi nung lidar ta bilemdi. Nisunger arshi tatsüka nung asenokbo yamaji ochimashi, tashiyim aser mapa tamajung inyaker aotsü na (?) ta kodang asenoki jungjunga bilemdangdir, atangji ajak amajok süaka taküm tatsüka alidang mapa meshitak aser meindang inyakba amajokjisa tuluba asütsü.

OLEMSABANG

Shi aser Tanela nung Teintet Rogo Kümshiba

~ K.Temjen Jamir.

*(Iba ya 2025 küm September 19 nü Dimapur District Ao Pensioners
Telungjem lokti senden nung jembiba onük lir)*

(Yashi adok nungi...)

Aji oda, asenok Pensioners Telungjem tentetba ya züngsem pur asüpila sentep nung tepila o ashitsü tentet ama dang mebilemi, taküm alidang shi aser tanela nung tashi itshir, külemi nisungtem temoatsü aser anisüngzük angutsüsa Tsüngremi mulungba mapa tapu balala inyaktsü asenoki bilema sentong atongtsüla.

Iba amaji asenok shi aser tanela nung kümshitsü asoshi asenok temang arakzüktsü nüngdaker, anungji, asenok temang arakzüka shi aser tanela nung kümshiba ajanga Tsüngremi mulungba mapatem nung shilem agia, alima aser nübortem nem tajangzük agütsütsü asoshi asenok rongnung Group balala lemsar, Group shiai pei Group dak apet sentong yanglua inyaktsü asoshi kü tebilemba kar asenok den lemsateper :

1. Good News Team - Mission (Soul winning) mapa inyaktsü. Mission trip aotsü. Adult Sunday School aser Bible Study sentong tenzüksü akok.
2. Music Club : Asenok rongnung kentenertem ayongdena kenten sentong balala ayongzüka akatsü.
3. Sporting Team : Asenok rongnungsa Saisapong jangrartem anidena saisapong sentong balala yanglua telungjem akangshitsü aser tangar kintem dena tesentaktep yanglutsü.
4. Art & Literature Club : Kaket ken o zülutepa aser noksa yanglutepba sentong ayongzüka akatsü, Küm shia essay aser poem zülutepba sentong alitsüa akok aser itemji kaket küma adoktsü.
5. Farming Team : Pensioner shia pei ki anasa atsü nung naro, aonsutsü mesüra süngjanglijang karbosa züsendaktsütsü aser shirurua metsüdaktsütsü.
6. Pensioners' Marketing Team : Tesem tajung ka shimteter Pensioners' Daily Market ka lapoktsü aser yangji Pensionertemi züsentaktepba, metsütetba aser yanglutetba naro, aonsutsü, süngjanglijang, akshi, an, entsü, ango aser osettsüset tapu balala alizüka kari ayoktsü. Iba ayokba nung jagi nisung shiai 2% Pensioners' Mission Fund-i yoktsüa akok aser tanüngbajibo kibur agitsü.
7. Lanurtem asoshi Life Skilling & Reformation Center ka lapoka lanurtem peisasa mazüokteter aser mapa mangurtem yaritsü. Iba ama yabo Kohima pur pensioner-tema ayongsemer külemi inyaktsüa akok.

Item mapatem yagi asenok government mapa nungi anen dang ashi, taküm aser temangbo retire mesüi shi aser tanela nung tashi itita mazüangi dang inyaka alitsü. Iba jagi asenok arishia alangtsü aser asen arishi anogotem amajok nung mesüidaktsütsü. 1 Tesalonika 4: 16-18 nung ashir, " Kibuba arudang asenok taküm alirtem, tasürtem dang nungi kodaka-ang tama makümtsü, kechiyong washiba agi, tamarenba kotak tenyar ola agi aser Tsüngrem jangzü ola agi Kibuba peisasa kotak nungi alutsü, aser Khrista nung asürtem tama shia arutsü, idangji asenok taküm alirtem, anüng nung Kibuba den ajuruteptsü aser parnok den külemi mepet nung ayipa atutsü aser yamaji asenok teti Kibuba den alitsü."

Iba anogo ya matong tashi aser majuru tashi asenokbo pei pei jangraba mapa inyaka atatsü asoshi Group-Group-ji lemsar mazüangi inyaka atadi. Asenok ya asenok agitsü kisüng inyakba nungi masü saka tangar asoshi tajung inyakba nungiang tepela aser tesünep angur, aser tepela o tesünep naji asenok shi aser tanela kümshitsü asoshi mozü tajungtiba ana lir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Longjang B/Arogo nung Teintet Rogo asoshi Free Medical Camp ka agi



Mokokchung, Mongputeni/ October 05 (TYO): Lokti ajak asoshi tongshi aser longzük ya Teintet rogotem ya lir; parnok arishia aliba den külemi temang anema alibaji asen lokti asoshi kangasa tongtimbang, ta Longjang Baptist Arogo nung pastor, Senti Longchar-i sangdong ka ajanga metetdaksü.

Tanü timtem balala ajanga tamang nung mokokmein tonger alirtema aikasa lir, saka talisa yimtsüng nung alirtem aikati mozüki nung oa mozü tajung

magiteti lir, anungji parnok asoshi nüngdakba mozü agütsütettsü nükla nung Teintet Rogo Deobar (Senior Citizen's Sunday) nüngtem nung parnok nem akhüm agüja Mongputeni 4, 2025 anogo nung Longjang Baptist Arogo ajanga Longjang Baptist Arogo nung aliba Teintet rogo asoshi "Free Medical Camp" ka ayongzüka katsüogo.

Iba Camp nung Impur Christian Hospital (ICH) nungi Palliative Care team Dr. Aka Longchar, Medical Superintendent ICH-i anir Mrs. Narola Walling Chaplain, ICH-i achayanga arua kanga takok nung agiogo. Ajak agi teintet rogo 100 shi arua temang tendangba den külemi mozü tajung angati agütsüogo.

Longjang Baptist Arogo ajanga ICH Palliative Team dang sentong takok ngutettsüa nübo aser sempet ajak agi yaritepba asoshi pelaba lemsateper.

Maneni nüngdakbapur tongtettsü Longjang Baptist Arogo Tsüngremi moatsütsü tamang sarasadem ayur.

Alima nung Khristan million 100 ket nungbo Laishiba mali

October 05, 2025: Tang alima nung Khristan million 100 ket nungbo Laishiba mali, aser ibaji talisa linük aika nung ozüng ajanga Laishiba nokdangba mesüra Laishiba agi anüngba agi lir, ta Brihostibarnü Bible Access Initiative reort ka ajanga metetdaksü.

Bible Access Initiative-i sangdongba Bible Access List nungji Laishiba angutsü kanga asakba linük 88 nung mongintemi bendenba osang tejangja lir.

Alima nung Laishiba tesashiba nokdangba linük ponguji- Somalia, Afghanistan, Yemen, North Korea aser Mauritania lir aser Khristantem Laishiba agi kanga anüngba linük ponguji Democratic Republic of Congo, Nigeria, Ethiopia, India aser China linüktem nung Khristan million aikati Laishiba aginer saka mangur.

Iba report renemba nung shilem agir, Wybo Nicolai-i, "Tanü-asüng ayawara tapu ka lir, aser ibaji Laishiba agi anüngba wara lir. Nisung aikati pei oshi nung tang tashi Laishiba mangur, aser aikati Laishiba alitsü senotsü agi meperir," ta metetdaksü.

Iba research ketdangsüa

Access List ya ajanga item tebilemstsü onük balala metetdaksür," ta ashi.

Bible Restrictions List nungsa sorkartemi Laishiba nokdangba, tanga yimsü alia amangertemi nokdangba aser tanga kuli balala nung ajemdaker Laishiba nokdangba metetdakja lir.

Bible Shortage List nungsa Laishiba nüngdakbapur Khristantemi Laishiba mengutetba kuli balala metetdakja lir.

Talisa Democratic Republic of Congo, Nigeria, Ethiopia, India aser China linüktem nung Khristan million aikati Laishiba aginer saka mangur.

Iba report renemba nung shilem agir, Wybo Nicolai-i, "Tanü-asüng ayawara tapu ka lir, aser ibaji Laishiba agi anüngba wara lir. Nisung aikati pei oshi nung tang tashi Laishiba mangur, aser aikati Laishiba alitsü senotsü agi meperir," ta metetdaksü.

Iba research ketdangsüa

agisang, Jaap Van Bezooijen-i, "Alima tesem balala nung Laishiba angutsü asakba tebilemstsü onük balala lir. Iba tebilemstsü onük bentettsü atema lenmang kaji digital tools lir, ajisüaka sensakertem, internet mamshirtem mesüra tenokdangba aliba linüktem nung alirtemibo digital tools ajanga Laishiba mezüngteter. Temenüngba Laishiba aser audio Laishiba-a nüngdaker," ta metetdaksü.

Bible Access Initiative ya Open Doors International aser Digital Bible Society-i tenteta liasü. Arogotem aser mission organizations nem osang balala agütsütsü nükjidong nung Bible Access Initiative ya tenzüka liasü.

Bible Access Initiative nung Digital Bible Society, Frontlines International, Bible League International, Biblica, Bible League Canada aser OneHope-ia yariteper.

Bible Access List report tejangjaji bibleaccesslist.org nung angutsü.

Nigeria nung Khristantem tepsetba atema media-i ola madoker: Bill Maher

September 29, 2025: Nigeria nung Khristantem jenti tepsetter, ajisüaka media-i item ama osang mesangdonger, ta America nunger asayamenür aser television host, Bill Maher-i metetdaksü.

HBO talk show "Real Time with Bill Maher" nung Maher aser Rep. Nancy Mace, R-S.C. na o lemtepba mapang nung Maher-i, "Nigeria, iba tebilemstsü onük ya nüburtemi memetet, iba ya tesüngmangtsüka lir," ta ashi.

"Ni Khristan ka masü, ajisüaka Nigeria nung parnoki asalentong yanglur Khristantem jenti tepseter. 2009 küm nungi tenzüka parnoki Khristan 100,000 dak tema tepsetogo. Parnoki Tenla ki 18,000 rongdoktsüogo. Parnok ya Islamic telok, Boko Haram lir," ta Maher-i ashi.

Paisa, "Tang Gaza nunga asalentong yanglur nisung jenti tepsetdar, ajisüaka Gaza dang nungibo Nigeria tensa tamajungba. Parnoki Nigeria nung Khristan nütsüng ajak samatsütsü meranger," ta ashi.

"Ibaji anema lanurtemi ola adoker asü? Osangbenertemi iba osang mesangdonger aser United States nunga nüburtemi iba tatalokba anema ola madoker," ta pai ashi.

ANOGO ABEN TSÜNGREM DEN

Tamangji jibi metsüjang tila ka ama - Luke 13:18-30

Nenok dak tamang jibijang teka lira ... nenok asoshi tamakoktsü kecha malitsü. Mathi 17:20.

Yisui jebi metsü jang tila nung asenoki temulung agütsütsü ashi. Nai ne tekabu nung lisem jang ka aser jibi jang ka ta am nung aji jangja angutsü asoshi tashi aliba aina agiang reprangtettsü, mesüra nai tepilaji meshitettsü. Tsüngrem tesüngmangtsü ain aser tashi iba oset tila nungji lir. Jibi jang nung ji taküm lir. Ibaji ali nung remang. Yisui asenok dang ashir, aser ibaji ali nung tera ayangtsü aser ibaji süngdong tulu küma aintsü - süngsang aotsü, tutem adoktsü, aser tepen apungtsü, ozütem asoshi süngdong tulu küma iba aküm nung parnok jenoktsü aser parnok tesepe yanglutsü.

Iba O entepba yangji tamanger ishikati Yisu sülen anidak aser Tsüngremer temoatsü kübok tashi tait telok ka akümstsü ta ashir. Aser ibai maneni aintsü kechiaser telok kar den sentepa missionarytem yoktsü aser tangara Khristar arogo dangi anir arutsü. Alima tesem balala aika nung iba inyakyim yagi arogotem tenzüka ao. Yisu Khrista osangtajung, asenok temenen nungi kümzüksang Kümtetdakba dak shirnoki amanger parnok asoshi tekümtet Tsüngrem ain lir. Asenok nüngdakbaji tashi taitba tamang, Khristar nübur asoshi tamakoktsü kecha mali ta amangba tamang nüngdaker.

Takoksang Tsüngrem, Ne mapa inyaktsü asoshi jibi metsü jang taka onok tamang nüngdaker. Amen.

Islamabad nung pastor ka khasettsü merang saka kümzük



October 05, 2025: Pakistan yimtiba, Islamabad kübok Iqbal jila nung nisung kari Presbyterian pastor ka khasettsü merang, ajisüaka iba lendong nungjagi pa jenbuogo, ta International Christian Concern (ICC)-i metetdaksü.

Amongnü (September 28) anepdang Pakistan Presbyterian Christian Church nung tongti, Pastor Kamran Naz tekülem sentong ka nung adentsü atema Gujranwala nungi Islamabad-i aoba mapang nung iba lendong atalok.

Pa tetsü tena Iqbal Town bus stop atongba mapang nung nisung ana motorcycle ka nung aruba sülen pa dak injang khaloktsü. Injang agi pa tetsüng dang yiru, iba sülen pa dak injang khaloktsürtemji jena oadok.

Anasa alirtemi pastor ji Pakistan Institute of Medical Sciences-i anir ao. Police-i iba tatalokba dak sendakba nung First Information Report (FIR) ka benokba sülen bushisüngdang tenzükogo.

Pastor Naz-i Pakistan nung Afghanistan nunger refugee tem tenzüka aruba atema kari pa taküm amokmerena liasü. Pa taküm maneni amokmerenba agi pai par kibongbo Islamabad nungi anir oa Gujranwala nung jenokdakja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Timsü**

(v) shitakleni (rightly)

* Senden nung ken o timsü len jembira melamelaa angateter.

Timyim

(adj) shitakbarenm shitakbalen (proper)

* Jashia alidang timyim agi jembira tejashi anendoker.



Tir Yimym

OLONG PAITEP # 7291

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amana - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anügdang masü - (5)
14. Jabaso masü - (4)

OLONG PAITEP # 7290 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER

Cyclist aser social media star Aurelien Fontenoy-i all-terrain bike ka ajanga Eiffel Tower, France nung second floor tekaratiba atongba otsü yangluogo. October 2, 2025 nü Fontenoy-i minute 12 ser second 30 nung all-terrain bike ajanga 686 steps tuteta second-floor atong ta Societe d'Exploitation de la Tour Eiffel-i kuli agütsüogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimym bureau tem nung agüjang.

CBSE-i Tripura nung mezügbuba sub-regional office lapok

Agartala, October 5, 2025 (Agencies): Central Board of Secondary Education (CBSE)-i Tripura nung mezügbuba sub-regional office ka lapokogo aser iba ajanga state nung education kanga renloksü.

October 4, 2025 nü Agartala nung lapokba office ajanga Tripura ajungalen schools, tesayurtem, aser kaketshirtem asoshi CBSE dak sendakba maparen tezübaba akümtsü. Iba ya melapokdang parnoki Guwahati regional office den asügdangya inyaksangshia aru.

"Iba ya Tripura nung mezügbuba sub-regional office lir. Local rejutemi iba atema mapang talangka takhangba agüja aruogo. Tang iba office ya Rabindra Nagar nung lir aser kobi melii airport anasa ki balaka yanglutsü" ta Education Department ketdangsür kati ashi.

Iba office ajanga admissions, student & subject record corrections, coordination of exam centres, mark sheet updates, grievance redressal, aser teacher training programs maparen nung yariteptsü. Iba office ajanga state education ketdangpurtem aser regional institutions den amalitepa inyaksangshia aotsü.

Cathrine Mossang-i Arunachal Pradesh nem konang bentsür aru

Bordumsa, October 5, 2025

(Agencies): 4th Kaushal Deekshant Samaroh 2025 nung Prime Minister Narendra Modi-i Arunachal Pradesh nungi Cathrine Remto Mossang nem sempet agütsüba ajanga state asoshi konang bentsür aruogo.

Vigyan Bhawan, New Delhi nung sentong agidang PM Modi-i ITI Balinong (COPA Trade) student Cathrine nem iba sempet agüja liasü.

Cathrine ya Changlang District kübok Namphuk nungi lir aser lai iba sempet anguba ya lar kibong aser reju atema dang masü saka Arunachal Pradesh

nung alir ajak asoshi lir.

Ministry of Skill Development & Entrepreneurship, Government of India-i kümshia Kaushal Deekshant Samaroh ayonga amunger. Iba ya Skill India Mission benjungteptsü aser linük kübok Industrial Training Institutes (ITIs) balala nungi kaketshir tajungtem ajiteta tushir.

Iba sentong ajanga lanur trainees-i skill development meranga agitsü aser linük yangerba nung shilem agitsü ajungmesor.

2025 sentong nung ITI students, trainers, aser

ketdangsür meyirjang aika anidena shilem agiogo.

"Cathrine-i takok anguba ajanga Miao aser Arunachal Pradesh nung nüma atanger" ta Miao Constituency nungi BJP MLA Kamlung Mosang-i ashi.

"Cathrine-i bendanga agütsüba aser takok tulu anguba atema onoki tenüngsang tulu agütsür. Cathrine nai onok nüma tangdaksür. Kasa mapang ITI Balinong nung faculties-i anibelem arema aser bendanga agüja kaketshirtem sayutetba atema tenüngsang agütsür" ta MLA Mosang-isa ashi.

Zubeen Garg asüba nung yimtenren tasa ka lir: AJP

Guwahati, October 5, 2025

(Agencies): Assam nung ajaki meima aliba Zubeen Garg taitüsü keta asüba nung yimtenren tasa ka lir anungji Supreme Court-i repranga bushisügdang ka asütsüla ta Assam Jatiya Parishad (AJP) Secretary Chittaranjan Basumatary-i ashi.

Zubeen Garg nem meim chidaksü aser tepset asütsü akok ta osangtem angazüker aser iba atema onok temulung raksar aser aoksar ta Basumatary-i ashi.

Chief Minister Himanta Biswa Sarma-i iba ya "politicized" süogo aser asür Zubeen asoshi teinyaktsü meinyaker ta Basumatary-isa ashi.

"State ajunga mangyimba mapang Himanta Biswa Sarma-i nügdakba maliba onüktem bener arua politicized süogo. Pai cabinet minister ka yoktsü ta nangzük saka Zubeen Garg mang Assam-i bener aruts atema tayimtsü anepalu mesütet" ta paisa ashi.

Zubeen Garg nem tetushi



agütsüba sentong nung maparen shitak meinyakba atema aitsür ta AJP lennir Basumatary-isa shisem.

"Zubeen Garg nem tetushi agütsüba nunga maparen meshitak inyak. Pa pusemer 100 temai temeten meshi saka parnok tepuokdak yua lir aser tebilemtsü khuret alirtem dakbo mekongshir" ta paisa ashi.

Chief Minister Sarma-i Nepal tetshia tsübudaksü aser Delhi nung Siddharth Sharma maputsü atema ozüng maparen nung tebang ai ta Basumatary-isa tai tongloksü.

Special Investigation Team (SIT)-i Shyamkanu

Mahanta'er kidang mita reprangdang Chief Minister den tesentaktep tajung alirtem dena liasü aser Riniki Bhuyan Sarma kümzüka ayutsü atema tongtipang kulikaket kar asaa mimbang ta paisa ashi.

"Zubeen Garg'er kibongi post-mortem report agizüksü atemaa tsübur. Iba ajanga pa asüba politicized asüba sayur" ta Basumatary-isa shisem.

"Chief Minister'er kibongi iba ken o nung meinprongba aser tebilemtsü khuret alirtem pua maruba den Zubeen Garg nem Bharat Ratna kechiba magütsü sorkari jangjatsütsüla" ta Basumatary-isa ashi.



OFFICE OF THE
LANGPANGKONG KAKETSHIR MUNGDANG

Langpangkong Students' Conference

H.Q. Chuchuyimlang - 798614, Dist. Mokochung : Nagaland
Email : Langpangkongkaketshirmungdang@gmail.com

LKM-I KOKOA MANG AYIMER

AYA ozü Lenir, Wb. Mayang Lima, NJS, Chuchuyimlang nunger, Wb. Limakumzuk dak atang, Former District & Sessions Judge, Registrar Guwahati High Court (Kohima Bench), Vigilance Commissioner Nagaland, UPA-Lokayukta Nagaland. Langpangkong nunger dang masü Naga nunger asoshi Nükrangdong, Akhümdong, Akhüm taket Lenir tajung, na kodaker-i moaoko saka Akümlir rongjenseta LANGPANGKONG KAKETSHIR MUNGDANG (LKM), Tzükongsanger ajak süngmangsetta ajungben pungmang medem akümlir nungi pilaba osang angashidang kanga nemjema, sasasetta Langpangkong sanger ajaki KOKOA MANG AYIMBA AYIMOKTSÜR.

Former Langpangkong Kaketshir Mungdang (LKM) Corpus Fund Treasurer, Langpangkongsanger Shisa Tzüpokdak, Tsürapur, medemmer, adianu tajung, ajak den liro medema litetba taküm ANJUNG TENARI nung Alima doktsür aonung LKM-i nü senpet aser mapa tajungtem mamatetter. Temoatsür Tsüngremi Tzükong nungi pa ama Tashi Tawaer ayika adokdakangma.

Kibur Tsüngremi asür tanela tatem maka tepela alidak anisüngzük agüjangma aser doktsür aoba kibong, kinungertem molung süngzük agüjangma ta LKM sarasadem.

Junga oangma Lenir tajung. Tatem salem.

Sd/-
IMLINOK
PRESIDENT LKM

Sd/-
MEYITONGPANG
GENERAL SECRETARY LKM

Nepal alinen aser tzümetsüng lendong nung nisung 47 asü

Kathmandu, Mongputeni/Oct. 05 (Agencies): Nepal nung tzunglu kanga sashia aruba ajanga alinen alua aser ajungben tzümetsüng adokba nung nisung 47 süogo aser lenmang tem nokdanga apu pongzüka oa lir.

India den arütsülen linük anüdoklen Ilam district nung alinen aluba nung nisung 35 asü, ta Armed Police Force indang odongtar Kalidas Dhauboji-i Deobarnü metetdaksü.

Hokulbarnü tzümetsüng agi nisung toku pongzüker aoba samar bushir aser ano tesem kar nung tzungi aiba ajanga nisung asem asü, ta pai ashi.

"Samar alirtem maneni bushitar," ta Nepal nung National Disaster Risk Reduction and Management Authority odongtar Shanti Mahat-ia ashi.

Ministry of Home Affairs ajanga Hombarnü aser Mongulbarnü linük tesem ajunga nung sodi alitsü sangdonga lir, saka yangji

emergency services aser disaster response team tem maden.

Tzunglu sashia arutsü takzüa aliba ajanga iba mera ya agir, ta sorkar indang odongtar Rameshwar Dungal-i ashi.

Tzüngsang-mopung takzür temi district ter dak tema 'red alert' nung lir ta sangdongogo aser iba department tekolak Kamal Ram Joshi-i nüburtem dang ayong anasa nungi tangsa ainshitsü metetdaksüogo.

Iba alerts ya linük yimtiba, Kathmandu densema nisung longsoa aliba tesem timba nung lir aserBagmati, Gandaki, Lumbini aser Madhesh province tem nung Hombarnep tashi tzunglu kanga sashia arutsü imlar.

Gari jajaba lenmangtem kanga sashia raksaogo aser Kathmandu telungi aiba tongtipang lenmang ajunga raksatsür lir.

Kathmandu nungi China indang arütsü den sendaktepba

Araniko Highway nunga tesem balala nung lenmang anenzüka oa shibangogo aser anüdoklen region den sendaktepba BP Highway nunga jana aser lishi agi anenbanga lir.

Tenük agi junga manguba ajanga aviation ketdangsüri linük telungzük nung senzüba tayimtsü tem Honibarnü songdem, saka international operation maneni lir.

Nepal southeast tsütsü Koshi River nung tzü ya anaben agi tali ayimba ajanga tebilemstü akar.

Koshi Barrage nung sluice gates 56 prong lapokogo - kong yimya agi 10 nungi 12 tashi lapoker - aser ketdangsür temi iba apu alema gari tulu mesenzüdaktsütsü asadangtar, ta yangji aliba ketdangsür kati ashi.

Küm shia meyi mapang alinen aser ajungben tzümetsüng ajanga tenem timba aliba Nepal nung nisung noklang aika asür.

Russia-i maneni Ukraine amaker; nisung 5 tepsetogo

Lviv, Mongputeni/October 5 (Agencies): Russia-i maneni missile aser drone tem amshia Honibar aonung nungi Deobar anepdang tashi Ukraine kübok tesem balala makogo, ta ketdangsürtemi Deobarnü metetdaksü. Tesem balala amakba mapang nisung pongu tepset aser energy facility tem densema civilian infrastructure tem raksatsüogo.

Asürtem rongnung nisung pezü kibong ka nung liasü. Poland den arrtsü nung aliba Lviv tesem nung nisung aliba ki ka amakba sülen parnok pezü ya asü, ta local prosecutor temi metetdaksü.

Lviv indang regional yimtiba nung industrial park ka nunga mi adok aser yimti kübok tesem kar nungbo power makai aküm, ta mayor Andriy Sadovyi-i ashi,

shibai Deobarnü yimti nung alirtem dang parnok ki metoktsütsü mepeshi, kechiyong ketdangsürtemi yimti kübok tesem balala nung mi adokba temseptsü meranga liasü.

Lviv yimti amakba ya rara tenzüker tang Lviv tesem temeket tesashitiba amakba asütsü, ta State Emergency Service otongdari ashi.

Kasa mapang nung southeastern Ukraine kübok Zaporizhzhia tesem nunga nisung ka tepset, nisung 10 yirutsü aser kibong 73,000 dak tema power makai aküm, ta governor Ivan Fedorov-i ashi.

Ivano-Frankivsk, Vinnytsia, Chernihiv, Kherson, Kharkiv aser Odesa nunga civilian infrastructure tem raksaogo, ta Ato Kilonser Yulia Svyrydenko-

i ashi.

Ukraine energy ministry-i ashiba agi, Zaporizhzhia aser northern Chernihiv tesem nung energy facility tem raksaogo.

Russia Defence Ministry-i Deobarnü ashiba agi, parnoki Ukraine indang military-industrial facility aser iba den gas aser energy infrastructure tem makogo.

Rara tenzüker asükwa pezübuba tonga aruba mapang Moscow-i tawa asendenshir Ukraine indang energy grid tem maka arudar. Iba rara tembangtsü atema sensaksem sentong balala ayongzüka agidar, saka tang tashi tangatettep ka dangi maruteti lir.

Tir Volodymyr Zelenskiy-i ashiba agi, Russia nunger sepaitemi missile 50 aser drone 500 shi yoka liasü.

India ya par warplanes teraksa agi nembangtsü: Khawaja Asif



Islamabad, Mongputeni/Oct. 05 (Agencies): India indang mitkar aser yimten yimsüsür lenirtemi rara mesüa o jembir ta shia Pakistan indang Defence Minister Khawaja Asif-i India ya par indang raradang amshiba tayimtsü teraksa agi nembangtsütsü, ta ashi.

Tawa India nunger mitkar aser yimten yimsüsür lenirtemi jembiba ya par dak tamang makateti kumer aliba

yanglushitsü merangba nung tamakok ajuruba lir, ta Asif-i social media X nung ashi. Par linük telung nung aliba nüburtemi aitsütsü aliba mesüzüktsü mechi sorkar tensa tamajung adokdaksür ta pai ashi.

"Pakistan ya Allah tenüng nung yangluba linük ka lir, aser asenok kumzüka ayur ya Allah indang sepaitem lir. Tanbo India ya par tayimtsü teraksa nung

aremtsü. Allahu Akbar," ta pai ashi.

April 22 nü Pahalgam nung kiralongrar temi amakba langzüa India-i May 7 nü Operation Sindoor tenzüka kiralongrar indang ki o jen nung maka kiralongrar nisung 100 dak tema tepsetba sülen kuli kecha magütsüi Pakistan-i takok angu ta jembir. India-i Pakistan indang drones aser jets kar raksatsü aser Pakistan mitkar indang airbases raksatsüba satellite noksa nunga sayur.

Külen itdangiter osangtem ajanga ashiba agi, Khawaja Asif-i tamangba yimsü aser azüdokshitsü benoka jembiba ya kangasa tia maka aser pa dak tebilemba tamajung aliba sayur. India nunger tashi ya o jembiba nung masü saka mapa agi sayur ta parnoki ashir.

(Maneni tapak 8 nung...)

MOLUNGNEN O



15.06.1956 ~ 29.09.202

Onoki teti meima aliba **Asür Lipokyanger Aier** shirangba mapang aser akumli wadang tembangba mapang ozü den yariteper ajunga dang ozü mulung taroktiba nungi tepela lemsateper.

Nenok sarasadem, o tajung aser lenmang balala nung yaritepba ajanga iba tesama tulu koktettsü tashi agütsüogo. Talisa pa tembar, kidanger, kinunger, Eden Medical Centre Dimapur aser Dr. Imkongliba Memorial District Hospital Mokokchung nung doctor aser nurse tem aser azü agütsürtem dang pelaba lemsateper.

Nenok temeim aser teyaritep onok mulung nung teti alitsü. O agi junga rasaa meshiteter, anungji 'Kanga Pelar' ta lepshia ashir aser Tsüngremi nenok ajak mulamushia moajang ta sarasademtsür.

~ Kinungtsü, jalatem, jabaso, semchir aser anük-apang

MENUNGRA BILEMTETER



Onoki teti meima aliba tsürabur asür Ojala **Imolangla Pongen** (Chuchuyimlang), na akümüli wadang tembanger 06-10-2024 anogo teti alitsüba limai aoba bilemteter.

Na onok nungi pilar küm ka rentetaka nü temeim, aria bilemba aser teti tepela jaksübangsü onok den anogoshia lir aser menungrar.

Onok mulungjang aser sarasadem nung na teti lir

~ Temeim chirnurtem aser kinungertem.

Indonesia school chirepba lendong nung asür 36 jungogo

Jakarta, Mongputeni/October 5 (Agencies): Honibarnü tashi nung Indonesia nung Islamic boarding school ka ki chirepa nung asür 16 liasü saka Deobarnü tashi nung 36 jungogo, ta linük disaster mitigation agency-i Deobarnü metetdaksü.

Anogo tenetnübuba tashi nung ano kaketshir 27 samar bushidar. Kaketshirtem ya arishi küm 13 nungi 19 tsüngda alirtem lir aser parnok ya ki chireper aliba nung sabanga lir aser taküm alitsübo kangabo mimlar, ta agency-isa metetdaksü.

Ki chireper aliba merektetsü aser teküzmükba maparen balala inyaktsü atema crane tem amshidar aser mapa shilem 60 bo tembanga inyakogo, ta agency-i ashiba den jana ya Hombarnü tashi nungbo ajak merekteta bushisüngdang tembangtsü imlar, ta shisem.

East Java province kübok Sidoarjo nung Al Khoziny school

ya taoba Hombarnü chirep. Ki chirepba mapang kaketshir noklang ishika sarasadema liasü. Ki sülokyonga tuya aliba tamendakdak agi metizükteti ki ya chirepa liasü.

Ki chireper aliba nung sabanga alirtem taküm mongutetba sülen Hokolbarnü tsürapurtemi machine tulu amshitsü atema temelaba agüja liasü.

Teküzmükertemi ki chirteper aliba mesapoka ai aser asangur chanutem tenüng ja liasü aser taküm alirtem arakzüba jangjatsü atema sensor tem amshi, saka taküm aliba temaitsü kecha mongutet.

Al Khoziny ya Islamic boarding school ka lir koba dang pesantren ta ajar.

Indonesia ya alima nung Muslim nunger timtiba aliba linük lir aser iba linük nung pesantren 42,000 nung kaketshir million 7 züngdar, ta religious affairs ministry data ajanga sayuogo.

Sabalenka Wuhan Open nung asayatsü renema lir

Mongputeni/October 5, 2025 (Agencies): World number one Aryna Sabalenka-i Deobarnü ashiba agi, US Open akokba sülen mapang tatsüka anisüngzüker la asaya tenzükshitsü asoshi renema lir.

Ita ka tejakdang New York nung Grand Slam pezübuba akokba sülen Belarus tsürla ya iba hopta nungi asaya tenzüksü.

La Wuhan Open nung asayatsü, kong lai asaya 17 nung khen danga tamakok mongui asaya arudar. La iba asayamung pezübenbuba akoktsü timla nung lir.

Kasa mapang nung arishi küm 27 tain Sabalenka ka temaba jenjang nung küm tembangtsü atema Iga Swiatek den toktepdar.

Wuhan nung asayamung kokra Sabalenka maneni temaba jenjang nung alitsü, saka la asoshi iba asayamung akoktsü kangabo temela masütsü, kechiyong lai Anna Kalinskaya

asere Rebecca Sramkova nung amala asayartem akoktsüla.

"Ni jangradema bilemer," ta Sabalenka-i ashi, shibai Beijing nung China Open nung shilem magitsü asoshi telemtetba agia US Open akokba sülen ita ka tepeyong masayai liasü.

"Ni kü temang kangabo mebelemdaksünü liasü, anungji ni temang anepalutsü asere renemshitsü atema mapang talila anisüngzüksü asoshi telemtetba shitak agiogo ta bilemer, aser ni tang asayatsü renema lir ama bilemer," ta lai ashi.

Sabalenka taküm asayamung tongtibang kar nung tesusatsüka tamakok nguogo. Australian Open final nung lai Madison Keys makok, Roland Garros final nung Coco Gauff makok aser Wimbledon semi-finals nung Amanda Anisimova mekoki liasü, ajisüaka US Open nungbo lai takok ngutetogo.

"Taküm kanga takok ngua asayar ama bilemer. Nükjidongji kasa dang asayatsü, anogoshia tajungba asayatsü merangtsü, world number one jenjang metoktsütsü, aser ni asaya kwika koktetdir repranga atatsü asoshi lir," ta laisa shisem.

Sabalenka Wuhan nung maneni takok ngua asayatsü merangba mapang Swiatek taküm mezüngbuba iba asayamung nung asayatsü lir.

La Beijing nung round of 16 nung Emma Navarro makokba sülen tang iba asayamung nung asayatsü lir.

Kasa mapang nung taoba küm finalist Zheng Qinwen bo teka tachichilen tekatsüla surgery agiba sülen taküm iba asayamung nung masayatetsü.

Maneni taoba mapang US Open champion Emma Raducanu, shibai Mandarin kanga junga jembiteter, la Wuhan nung taküm mezüngbuba asayatsü lir.

Inter Miami-i Sergio Busquets nem tetushi agütsü



Mongputeni/October 5, 2025 (Agencies): MLS club Inter Miami puri club nungi Spain nung nungtuu midfielder Sergio Busquets nem tetushi agütsüogo. Pa asaya nungi anisüngzüksü asoshi mapang tonga aruba mapang tang club-i pa tushio.

Arishi küm 37 tain asayar, shiba Barcelona nungi küm 20 jungnua asayaba sülen 2023 küm America-i oa liasü, pa nem New England revolution pur goal 4-1 agi akokba asaya tetenzükdang guard of honour ka agüja laisü.

Florida nung amendaker aliba club nungi asayartemi meketbanger Busquets ya ground telungi ai. Pa indang teammate Lionel Messi, Luis Suarez aser Jordi Alba nungeria pa sempet tajung asoshi pa nem tenütsang agüja liasü.

"O agi rasa ashitsü makoker. Kü mulung shilem kabo idaki nenok den teti alitsü," ta Busquets-i ashi.

"Kü career tajungtiba nung tembangtsü imlar," ta midfielder Busquets ya kanga anepa asayaba, tasa ajungba aser kanga süngjema ball amshiba atema kanga nungtuu lir, aser pa ya iba asaya puti otsü nung defensive midfielder tem rongnung tajungtiba ka ta züngshir.

Barcelona puri Spanish league title teku tashi akokba nung pai tongtibang shilem agi aser club-i Champions League asem akokba nunga pai teyari tulu agüja laisü.

Maneni Busquets ya 2010 World Cup aser 2012 European Championship akoba Spain team nunga densema liasü. Pa linük tenüng nungi 143 ben asaya liasü.

Pa 2022 World Cup sülen international football asaya nungi anen aser 2023 küm United States-i oa Inter Miami nung taoba mapang Barcelona teammate Lionel Messi den longjema liasü.

BENDANGLI OSANG : Tapak 7 nungi...

India ya par warplanes teraksa...

Linük telungzüker nung tashi maitba aser alimai senzuka yutsüba miimbangtsü mechi Pakistan-i tiazü olulu prokshir, saka India indang armed forces temi kanga kumdanga mera agir, ta osangtem ajanga ashi.

Item sangdong ya ajanga Pakistan lenirtemi linük nung rongsenketzüng jenjang samaa aoba, telung nung mepetmesü aliba nung nüburttemi rangloka aliba meyipdaksütsü merangba lir, aser iba ama o jembiba ajanga India tsüboa malitsü, ta itdangiter osangtem ajangasa ashi.

Hokulbarnü India Army Chief General Uperdra Dwivedi-i Pakistan dang Operation Sindoor 1.0 nung ama New Delhi-i atsü-anem mesayutsü aser tarutsü nung tayang kepzükbaba nungbo Islamabad-i parnok geography nung lidaktsüner aser masü ta bilemdaksütsü, ta shia liasü.

"Pakistan-i geography nung linüra, sorkari kiralongrar yariba anentsüla," ta pai ashi aser yaserbo India-i telangzüba agütsüba ya tawa counter-terror operation dang kanga agi tesashiba asütsü ta ashi.

Taoba mapang Chief of Air Staff Air Marshal Amar Preet Singh-ia India-i F-16 aser J-17 jets densema high-tech Pakistani fighters 12-13 khazuka yok ta shia liasü. Operation Sindoor mapang India indang fighter jets khazuka yok ta Pakistan-i ashiba aitsü aser kuli sayuang ta ashi.

Arütsü alema oa anogo pezü amakdang US-i yangluba F-16s aser China-i yangluba J-17s densema high-tech fighters pongu den AEW&C (Airborne Early Warning and Control) ka raksatsü aser par tayimtsü anendak aser military installations aika amak, ta Air Marshal Singh-i ashi.

Simran Sharma-i Women's 200m T12 Final nung bronze angu



Mongputeni/October 5, 2025 (Agencies): New Delhi nung tang asaya aliba World Para Championships nung Simran Sharma-i maneni kanga junga asaya lai Deobarnü Women's 200m T12 Final nung bronze medal ka nguogo.

Lai alizüng 24.46 seconds nung tongteta Colombia tsür Perez Lopez aser Brazil tsür Barros Da Silva na sülen tasembuba jenjang nung tembanga liasü.

Deobarnü Women's 200m T12 Final nung bronze medal anguba densema Simran-i World Para Athletics C'ships nung medal tanabuba nguogo. Lai Women's 100m T12 Final nung silver medal ka ngur liasü.

Lai iba bronze medal anguba densema India team-i ajak senteper medal 19 nguogo.

India indang para-athletics program ya 2025 World Para Athletics Championships, New Delhi nung alizüng tasen ka tongtetogo aser iba asayamung

nung tang tashi nung taküm medal timba ngutetogo.

Kidang asayaba mapang India nung asayartemi otsüsütsüsa kanga junga asayadar aser iba ajanga global para-sport nung linük putu tasen kati ayaoka aiba sayur.


Honibar aonung asaya tembangba tashi nung India team-i taoba mapang Para asayamungtem nung medal ngua aliba ajateta liasü. Honibarn aonung tashi nung India team-i gold 6, silver 6 aser bronze trok ngua ajak senter medal 18 ngur liasü. Taoba mapang India team-i iba asayamung nung medal timtiba angubaji medal 17 (6 Gold, 5 Silver, 6 Bronze) anguba liasü.

Yamal Spain tenüng nungi World Cup qualifiers masayatetsü

Mongputeni/October 5, 2025 (Agencies): Barcelona winger Lamine Yamal, groin yirushiba sülen pa hopt ana mesür asem masayatetsü. Pa taruba hopta World Cup qualifier nung Spain team Georgia aser Bulgaria na den asayatsü aliba asaya nung masayatetsü.

Arishi küm 18 tain asayar, shiba September ita international asaya nung asayaba mapang yiruba sülen asaya pezü masayateti liasü, pa Deobarnü asaya tenzükshia Barcelona puri goal 2-1 agi Real Sociedad akokba asaya nung shilem agia liasü.

Ajisüaka Barcelona pur Bodhbarnü Champions League nung Paris St-Germain den asayaba mapang Yamal yirushia liasü. Iba asaya ya Barcelona-i makok.



Barcelona-i sangdong ka ajanga ashiba agi, "PSG den asayaba sülen Lamine Yamal groin yirushia liasü."

"Asayar ya Deobarnü Sevilla den asaya nung masayatetsü aser pa aneptsü asoshi hopta 2-3 agitsü," ta kasa sangdong ajanga metetdaksü.

Yamal yirushiba ajanga club o linük na tsüngda iba lanur asayar anepaluba dak sendakba nung mangatettep aliba

tenzükshiogo. Pai tang asaya aliba season nung asaya pongu nung goal ana idaktsüba den assist pezü sütsür lir.

"Spain ya alima nung team tajungtiba aser parnok ket nung asayar tajungtibatem lir," ta Yamal mezüngbuba yiruba sülen Barcelona manager Hansi Flick-i ashi.

"Anungji parnoki onok indang asayar, onok team nung lanur asyartem anepalutsüla saka parnoki iba ya inyaker," ta paisha shisem.

Iba taitzüba indang asüngdangba mapang Spain manager Luis de la Fuente-i, parnok tsüngda kecha mangatettep mali ta ashi, saka Germany nung manager yagi iba olen lemsatepba ya mimlai aliba ka, kechiyong pa-a national team coach liasü aser pai ken o angatetsü imla liasü, ta ashi.

BILEMDANGANG

"Tetsübu koktetbaji shisatsü tetenzükdak lir."